

禦寇左氏戰國策後進多宗之又喜談兵慨然有經世心章宗南征兩上䟽策其勝負上奇之給送軍中後多如所料宰執愛其文薦入翰林

穆道穎悟 金史

穆刺履字履道遼東丹王突欲七世孫也父聿魯早亡聿魯之族兄興平軍節度使德元無子以履爲後方五歲晚臥廡下見微雲往來天際忽謂乳母曰此所謂卧看青天行白雲者耶德元聞之驚曰是子當以文學名世及長博學多藝善屬文又精曆筭書繪事先是舊大明曆舛誤履上乙未曆以金受命于乙未也世服其善

完顏希尹撰字 金史

完顏希尹本名谷神歡都之子也自元太祖舉兵常在行陣或

從太祖或從徽政或與諸將征伐比有功金人初無文字國勢日強與鄰國交好廼用契丹字太祖命希尹撰本國字備制度希尹乃依倣漢人楷字因契丹字制度合本國語製女直字天輔三年八月字書成太祖大悅命頒行之賜希尹馬一匹衣一襲其後熙宗亦製女直字與希尹所製字俱行用希尹所撰謂之女直大字熙宗所撰謂之小字

孔維使高麗明君臣之道 宋史

孔維字爲則宋太祖乾德四年九經及第解褐東明鄆陵二主簿太宗太平興國中拜國子周易博士代還遷禮記博士七年使海外高麗王治問禮於維維對以君父臣子之道升降等威之序治悅稱之曰今日復見中國之夫子也

柳開著書 宋史

柳開字仲塗就學喜詩論經義五代文格淺弱慕韓愈柳宗元
爲文因名肩愈字紹元既而改名字以爲能開聖道之塗也著
書自號東郊野夫又號補亡先生作二傳以見意而氣自任不
顧小節所交皆一時豪雋范杲好古學尤重開文世稱爲柳苑
宋太祖乾德初爲監察御史

王昭素易學宋史

王昭素博通九經兼究莊老尤精詩易以爲王韓注易及孔馬
疏義或未盡是乃著易論二十三篇太祖開寶中李穆薦之朝
詔召赴闕見於便殿時年七十七精神不衰宋太祖問曰何以
不求仕進致相見之晚對曰臣草野蠢愚無以裨聖化賜坐令
講易乾卦召宰相薛居正等觀之云王飛龍在天上曰此書豈可
令常人見昭素對曰此書非聖人出不能合其象因訪以民間

事昭素所言誠實無隱上嘉之

韓溥肉譜宋史

韓溥唐相休之裔孫宋太祖開寶三年爲監察御史溥少俊敏
善屬文周世宗顯德初舉進士累遷爲監察御史轉司門郎中
淳化二年被病表請辭職尋醫許之溥博學善持論詳練臺閣
故事多知唐朝氏族與人談亶亶然可聽號爲近世肉譜

王祐藻麗宋史

王祐字景叔少篤志詞學性倜儻有俊氣晉天福中以書見桑
維翰稱其藻麗由是名聞京師宋太祖受禪拜監察御史

楊億神助宋史

楊億字大年雍熙初宋太宗聞其名詔江南轉運使張去華就
試詞藝送闕下連三日得對試詩賦五篇下筆立成太宗深加

賞異命內侍都知王仁睿送至中書又賦詩一章朝臣驚其俊異削章為賀翌日下制曰汝方髫鬣不由師訓精爽神助文字生知越景絕塵一日千里予有望於汝也即授祕書省正字特賜袍笏

和蒙精思討索 宋史

和蒙字顯仁好修飾容儀自五鼓張燈燭至蟬色冠帶方畢雖幼能屬文殊少警策每草制必精思討索而後展拘於引類偶對頗失典誥之體宋太宗以其貴家子能業文甚寵待之欲召入翰林謂近臣曰蒙眸子眊眊然胸中必不正不可以居近侍也其命遂寤蒙弟嶸始為三班奉職太宗淳化中獻文求試上以故相之後改授大理評事

孫丁能文 宋史

丁謂字謂之與孫何友善同袖文謁王禹偁禹偁大驚重之以為自唐韓愈柳宗元後二百年始有此作世謂之孫丁太宗淳化中登進士甲科為大理評事真宗時召為右諫議大夫

賈黃中嗜學 宋史

賈黃中字媧民十五舉進士授校書郎太宗淳化中為叅知政事太宗召見其母王氏命坐謂曰教子如是真益母矣後出知襄州上言母老改知澶州因謂侍臣曰朕嘗念其母年七十餘未覺老每與之語甚明敏黃中終日憂畏必先其母老矣至道中擇大臣為賓友黃中在選中拜禮部侍郎代至兼祕書監黃中素嗜文籍既居內閣甚以為慰三年以疾卒年五十六其母尚無恙卒如上言

王博回文 宋史

王博文字仲明祖諫宋給事太宗藩邸為西京作坊副使博文年十六善屬文舉進士開封府以回文詩百篇為公卷人謂之王回文真宗時授監察御史

杜鎬彊記宋史

杜鎬字名周幼好學博聞彊記宋太宗朝改國子監承崇文院檢討凡所檢閱必戒書史云其事在其書某卷幾行覆之一無差誤每得異書多名問之鎬必手疏本末以聞顧遇甚厚士大夫有所疑難多訪以古事雖晚輩卑品請益應答無倦年踰五十猶日治經史數十卷或寓直館中四鼓則起誦春秋其勤如此

敕之詩書御屏事文類聚

楊徽之侍從太宗嘗問其姓名索其詩數百篇奏御詩云十年中

落今何幸叨遇君王問姓名太宗選十聯書于御屏問落詩曰誰似金華楊學士十聯詩在御屏間

朱台符尺牘成賦宋史

朱台符字拱正少聰穎十歲能屬辭嘗作黃山樓記士友稱之及長善詞賦時太宗廷試貢士多擢敏速者台符與同輩課試以尺牘成一賦

錢儼夢覘宋史

錢儼字誠允少嗜學博涉經史少夢人遺以大覘自是樂為文辭頗敏速富瞻當時國中詞翰多出其手歸京師日與朝廷文士遊唱詠不絕為時所尚太宗時出判和州

楊大雅著述宋史

楊大雅字子正真宗咸平中交趾獻犀因奏賦召試遷太常博

士朴學自信無所阿附直集賢院二十五年不遷有出其後者
往往致榮顯或笑其違世自守大雅歎曰吾不學乎世而學乎
聖人由是以此吾之所有不敢以薦於人而嘗自獻乎天子
矣天禧末與陳從易知制誥嘗因轉對上原治十七篇所著大
隱集三十卷西垣集五卷職林二十卷兩漢傳聞十二卷並傳
於世

晏殊試賦不欺宋史

晏殊字同叔七歲能屬文宋真宗景德初張知白安撫江南以
神童薦之帝召殊與進士千餘人並試廷中殊神氣不懼援筆
立成帝嘉賞賜同進士出身宰相寇準曰殊江外人帝顧曰張
九齡非江外人乎後二日復試詩賦論殊奏臣嘗私習此賦請
試他題帝笑許之遂成稱善擢秘書省正字殊性剛簡

養清儉文章瞻麗應用不窮尤工詩閑雅有情思晚歲篤學不
儀有文集二百四十卷及刪次梁陳以後名臣述作為集選一
百卷子知止為朝請大夫

周啓明篤學著文宋史

周啓明字昭回初以書謁翰林學士楊億億攜以示同列大見
嘆賞自是知名四舉進士皆第一真宗景德中舉賢良方正科
既召會東封泰山言者謂此科本因災異訪直言非太平事遂
報罷於是歸教弟子百餘人不復有仕進意里人稱為處士轉
運使陳堯佐表其行義於朝賜粟帛仁宗即位除試助教就加
廩給久之特遷秘書省秘書郎改太常丞卒啓明篤學藏書數
千卷多手自傳寫而能口誦之有古律詩賦牋啓雜文千六百
餘篇

錢易為文立就宋史

錢易字希白宋真宗景德中舉賢良方正科除秘書丞改太常博士直集賢院累遷左司郎中為翰林學士才學瞻敏過人數千百言援筆立就又善尋尺大書及行草有金閨瀛洲西垣制集一百五十卷青雲總錄青雲新錄南部新書洞微志一百三十卷行於世

李淑博習宋史

李淑字獻臣若谷之子也真宗時授校書郎館閣校勘淑警慧過人博習諸書詳練朝廷典故凡有沿革帝多諮訪焉制作誥命為時所稱其他文多裁取古語務為奇險時人不許也

秦淑字子思曾祖為暖水人因家焉少孤依外家劉氏真

宗時舉進士第一儀狀俊偉舉止端重真宗見之顧宰相寇準曰得人矣詔金吾給七騶傳呼以寵之狀元給騶自齊始也仁宗時為翰林學士加侍讀學士後為右諫議大夫御史中丞

晁迥夜對宋史

晁迥字明遠世舉進士為大理評事使契丹還奏北庭記加史館修撰知通進銀臺司獻玉清昭應宮頌其子宗操繼上景靈宮慶成歌真宗曰迥父子同獻歌頌播紳間美事也修國史既成擢刑部侍郎進承旨時朝廷方修禮文之事詔令多出迥手嘗夜召對帝令內侍持燭送歸院方盛暑為蠲宿直令三五日一至院迥辭以非故事乃聽俟秋還直遷兵部侍郎

薛映善筆札宋史

薛映字景陽好學有文該覽彊記善筆札章奏尺牘下筆立成

歷仕真宗仁宗遷禮部為集賢院學士卒贈右僕射謚文恭初為治嚴明吏不能欺每五鼓冠帶茶明據案決事雖寒暑無一日異也

楊億精密 宋史

楊億字大年仕宋真宗為翰林學士億天性穎悟自幼及終不離翰墨文格雄健才思敏捷略不凝滯對客談笑揮翰不輟精密有規善細字起草一幅數千言不加點竄當時學者翕然宗之而博覽強記尤長典章制度時多取正喜誨誘後進以成名者甚衆人有片辭可紀必為諷誦手集當世之述作為筆苑時文錄數十篇

李之才語邵雍以性命之學 宋史

李之才字述之仁宗天聖中進士初為衛州獲嘉主簿權其成今時邵雍居母憂于蘇門山百源之上布裘蔬食躬愛以養父之才叩門來謁勞苦之曰好學篤志果何似雍曰簡策迹外未有適也之才曰君非迹簡策者其如物理之學何他日則又曰物理之學學矣不有性命之學乎雍再拜願受業於是先示之以陸淳春秋意欲以春秋表儀伍經既可語五經大旨則校易而終焉其後雍卒以易名世

孫抃書樓 宋史

孫抃字夢得六世祖長孺善藏書號書樓孫氏子孫以田為業至抃始讀書屬文中進士仁宗皇祐中以右諫議大夫權御史中丞

蘇軾為歐公推服 宋史

蘇軾字子瞻既冠博通經史屬文日數千言好賈誼陸贄書既

而讀莊子歎曰吾昔有見口未能言今見是書得吾心矣宋仁宗嘉祐二年試禮部方時文磔裂詭異之弊滕主司歐陽脩思有以救之得軾刑賞忠厚論驚喜欲擢冠多士猶疑其客曾肇所為但宣第_二復以春秋對義居第一殿試中乙科後以書見脩脩語梅聖俞曰吾當避此人出一頭地聞者始謹不厭父乃信服

三蘇父子名動京師事文類聚

蘇洵仁宗嘉祐間與其子軾轍至京師歐陽脩得洵書二十篇大愛其文辭以為賈誼劉向不能過也以其書獻諸朝其二子同舉進士又同登制科一日父子隱然名動京師而蘇氏文章遂擅天下

何羣白衣御史宋史

何羣字通夫嗜古學喜激揚論議雖業進士非其好也宋仁宗慶曆中石介在太學四方諸生來學者數千人羣亦自蜀至方講官會諸生講介曰生等知何羣乎羣曰思為仁義而已不知寒饑之切已也衆皆注仰之介因館羣于其家使弟子推以為學長羣愈自刻厲著書數十篇與人言未嘗下意曲從同舍目羣為白衣御史

梅堯臣夷布識詩宋史

梅堯臣字聖俞仁宗時賜進士出身為國子監直講家貧喜飲酒賢士大夫多從之游時載酒過門善談笑與物無忤詎嘲刺機託於詩晚益工有人得西夷布弓衣其織文乃堯臣詩也名重於時如此

王巖叟廷對第一宋史

王巖叟字彥霖幼時語未正已知文字仁宗患詞賦致經術不明初置明經科巖叟年十八鄉舉省試廷對皆第一調樂城簿涇州推官

王臻奇士宋史

王臻字及之始就學能文辭自致堯知壽州有時召臻以文數十篇往見致堯覽之歎曰穎汝固多奇士舉進士中第為大理評事仁宗即位累遷尚書工部郎中

呂公著為士首宋史

呂公著字晦叔幼嗜學至忘食父夷簡器異之曰他日必為公輔補奉禮郎登進士第召試館職不就通判潁州郡守歐陽脩與為講學之友後脩使契丹契丹主問中國學行之士首以公著對判吏部南曹仁宗時除崇文院檢討同判太常寺

李清臣高材宋史

李清臣字邦直應材識兼茂科歐陽脩壯其文以比蘇軾宋英宗治平二年試祕閣考官韓維曰首姓氏筆力也試文至中書脩迎語曰才置李清臣於第一則謬矣

歐陽永叔為天下師尊宋史

歐陽脩字永叔宋神宗熙寧四年以太子少師而孤初脩四歲而孤母鄭守節自誓親誨之廬家貧至以荻畫地學書幼敏悟過人讀書輒成誦及冠巍然有聲宋興且百年而文章體裁猶仍五季餘習鏗刻駢偶洪忽弗振士因陋守舊論卑氣弱蘇軾元舜欽柳開穆脩輩咸有意作而張之而力不足脩游隨得唐韓愈遺藁於廢筆冢篋中讀而慕焉苦志探賸至忘寢食必欲并轡絕馳而追與之並舉進士試南宮第一擢甲科調四京推

官始從尹洙游爲古文議論世事迭相師友與梅堯臣游爲
歌詩相倡和遂以文章名冠天下爲文天才自然豐約中度其
言簡而明信而通引物連類折之於至理以服人心超然獨駕
衆莫能及故天下翕然師尊之

鄭穆四友 宋史

鄭穆字閔中性醇謹好學讀書至忘擲沐浴進退容止必以禮門
人千數與陳襄陳烈周希孟友號四先生舉進士登第爲壽安
主簿神宗元豐三年出知越州後拜國子祭酒

孫洙明練 宋史

孫洙字巨源英宗治平中求言以洙應詔兼史館檢討同知諫
院神宗獎其文擢翰林學士病卒洙博聞強識明練典故道古
今事甚有條理出語皆成章雖對親狎者未嘗發一鄙語文詞

其有西漢之風士大夫共以丞相期之不幸早世一時憫傷

王庠經說 宋史

王庠字周彥幼穎悟七歲能屬文儼如成人年十三居父喪哀
憤深切謂弟序曰父以直道見擠毋撫極誓言期我兄弟成立
贈復父官乃許歸葬相與勉之且制科先君之遺意也吾有志
焉遂閉戶窮經史百家書傳注之學尋師千里究其旨歸蚤歲
上范純仁蘇轍張商公書皆持中立不倚之論呂陶蘇轍皆器
重之嘗以經說寄蘇轍謂二帝三王之臣皆志於道惟其自得
之難故守之至堅自孔孟作六經斯道有一定之論士之所養
反不逮古乃知後世見六經之易忽之不行也軾復曰經說一
篇誠哉是言哲宗元和中舉皆不就後賜號處士

黃伯思詞采賦麗 宋史

黃伯思字長睿祖履以政殿大學士父應求饒州司錄伯思體弱如不勝衣風韻灑落飄飄有凌雲意自幼警敏不好弄日誦書千餘言每聽其祖講經史退與他兒言無遺誤者嘗夢孔雀集于庭覺而賦之詞采甚麗哲宗元符三年進士高第調磁州司法參軍

蘇軾轍文無定質 宋史

蘇軾字子瞻與弟轍師父洵為文既而得之於天嘗自謂作文如行雲流水初無定質但常行於所當行止於所不可不止雖嬉笑怒罵之辭皆可書而誦之其體渾涵光芒雄視百代有文章以來蓋亦鮮矣後哲宗時居海南作書傳又有東坡集四十五卷後集二十卷未幾又作五卷內制十卷外制三卷和陶淵明詩

四卷行於世

李廌奇才 宋史

李廌字方叔哲宗時人閉門讀書數年見蘇軾軾閱其所著歎曰張耒秦觀之流也鄉舉試禮部軾典貢舉遺之賦詩以自責呂大防歎曰有司試藝乃失此奇才邪軾與范祖禹謀曰廌雖在山林其文有錦衣玉食氣稟奇寶於路隅昔人所歎我曹得無意哉將同薦諸朝未幾軾與祖禹相繼去國不果軾亡廌哭之慟曰吾愧不能死知已至於事師之勤渠敢以生死為間即走許汝間相地卜兆授其子作文祭之曰皇天后土監一生忠義之心名山大川還薦古英靈之氣詞語奇壯讀者為悚

張耒作文以理為主 宋史

張耒字文潛楚州淮陰人幼穎異十三歲能為文十七時作函

關賦已傳人口游學於陳學官蘇轍愛之因得從蘇軾游軾亦深知之稱其文汪洋冲澹有一倡三嘆之聲弱冠第進士哲宗時貶房州別駕安置於黃五年得自便居陳州耒儀觀其偉有雄才筆力絕健於騷詞尤長時二蘇及黃庭堅晁補之輩相繼沒未獨存士人就學者衆分月載酒餼飲食之誨人作文以理為主嘗論云自六經以下至於諸子百氏騷人辯士論述大抵皆將以爲寓理之具也故學文之端急於明理如知文而不務理求文之工世未嘗有也夫決水於江河淮海也順道而行滔滔汨汨日夜不止衝衽柱絕呂梁放於江湖而納之海其舒爲淪運鼓爲波濤激之爲風颯怒之爲雷霆蛟龍魚鱉噴薄出沒是水之爲變也水一初言若是哉順道而決之因其所遇而變之焉

其所至者蛙之玩耳江河淮海之水理達之文也不求奇而奇至矣激溝瀆而求水之奇此無見於理而欲以言語句讀爲奇反覆咀嚼卒亦無有文之陋也

蕭振大器 宋史

蕭振字德起幼莊重不好戲稍長能自謀學嘗奉父命董農役雖在隴畝手不釋卷其師謂其父曰此兒遠大器也未冠游郡庠既冠升太學時有號三賢者推振爲首登徽宗政和中進士第調信州儀曹

秦觀溢於文詞 宋史

秦觀字少游一字太虛少豪雋慷慨溢於文詞舉進士不中強志盛氣好大而見奇讀兵家書與己意合見蘇軾於徐爲賦黃樓軾以爲有屈宋才又介其詩於王安石安石亦謂清新似鮑

謝軾勉以應舉為親養始登第徙郴州繼編管黃州又徙雷州徽宗立復宣德郎放還至藤州出游華光亭為客道夢中長短向索水欲飲水至笑視之而卒先自作挽詞其語哀甚讀者悲傷之年五十三有文集四十卷

尤袤雅正宋史

尤袤字延之高宗紹興中進士第為泰興令遷著作郎兼太子侍讀孝宗嘗論人才袤奏曰近召趙汝愚中外皆喜如王蘭亦望收召上曰然一日論事又上曰如卿才識近世罕有次日語宰執曰袤甚好前此無一人言之何也兼權中書舍人復詔兼直學士院力辭且薦陸游自代上不許時內禪議已定猶未諭大臣也是日諭袤曰旦夕制冊甚多非卿孰能為者故處卿以文字之職袤乃拜命內禪一時制冊人服其雅正

張闡因夢得名宋史

張闡字大猷幼力學博涉經史善屬文將命名夢神人大書闡字曰以是名爾父異之力勉其為學徽宗宣和六年進士第高宗紹興中遷祕書郎兼檢討國史院

周必大掌制宋史

周必大字子充少英特父死鞠於母家母親督課之宋高宗紹興二十年第進士授徽州戶曹中博學宏詞科教授建康府除太學錄召試館職高宗讀其策曰掌制手也

范冲朱墨史宋史

范冲字元長高宗時為宗正少卿兼直史館修神宗實錄為考異一書明示去取舊文以墨書刪去者以黃書新修者以朱書世號朱墨史

鄭樵著書 宋史

鄭樵字漁仲好著書不為文章自負不下劉向揚雄居夾漈山謝絕人事久之乃游名山大川搜奇訪古遇藏書家必借留讀盡乃去趙鼎張浚而下皆器之初為經旨禮樂文字天文地理蟲魚草木方書之學皆有論辨宋高宗紹興十九年上之詔藏祕府授右迪功郎禮兵部架閣

陳亮論議風生 宋史

陳亮字同父高宗時生而目光有芒為人才氣超邁喜談兵論議風生下筆數千言立就骨攷古人用兵成敗之迹著酌古論郡守周葵得之相與論難奇之曰他日國士也光宗時權授僉書建康府判官廳公事

倪思判詞精敏 宋史

倪思字正甫孝宗乾道二年進士除著作郎光宗即位典冊與尤袤對掌故事行三制並宣學士上欲試思能否一夕併草除公師四制判詞精敏在廷誦歎權侍立修注官直前奏陛下方受禪金主亦新立欲制其命必每事有以勝之彼者則以儉勝之彼暴則以仁勝之彼怠惰則以憂勤勝之

袁樞字機仲遠器 宋史

袁樞字機仲幼力學嘗以修身為己賦試國子監周必大劉珙皆期以為遠器試禮部詞賦第一孝宗乾道七年除大學錄論對三疏言甚確當喜司馬光資治通鑑苦其浩博乃區別其事而貫通之號通鑑紀事本末孝宗讀而嘉嘆之曰治道盡在是矣

孫氏三龍 宋史

孫逢吉字從之孝宗隆興中進士第授郴州司戶光宗紹熙元年遷祕書郎弟逢年逢辰皆有文學行義時稱孫氏三龍

李舜臣畫易宋史

李舜臣字子思孝宗乾道中進士第調邛州安仁縣主簿舜臣精於易學嘗曰易起於畫理事象數皆因畫以見舍畫而論非易也畫從中起乾坤中畫為誠故坎為中畫為誠明者本傳三十三篇朱熹晚歲每為學者稱之

楊簡書疏論治宋史

楊簡字敬仲孝宗乾道中進士第授富陽主簿元宗紹熙五年召為國子博士所著有甲黨乙黨乙冠記昏記喪禮家祀家祭記釋菜禮記石魚家記又有已易啓蔽等書其論治務最詳五其次八一日譯左右大臣近臣小臣二日譯賢以次任中

外之官三日罷科舉而行鄉舉里選四日罷設法道淫五日治伍法脩諸葛武侯之正兵以備不虞其次急者有八一日募兵屯田以省養兵之費二日限民田以漸復井田三日罷妓籍從良四日漸罷和買折帛暨諸無名之賦及權酷而禁羣飲五日擇賢士教之太學教成使分掌諸州之學又使各擇井里之士聚而教之教成使各分掌其邑里之學六日取周禮及古書會議熟講其可行於今者行之七日禁淫樂八日修書以削邪說此簡之志也

廖德明受學宋史

廖德明字子晦少學釋氏及得龜山楊時書讀之大悟遂受學朱熹宋孝宗乾道中登進士第知莆田縣請托不行遷漳州教授為學者講明心學之要手植三栢潯士愛之如甘棠在興立

師悟堂刻朱熹家禮程氏諸書公餘延僚屬及諸生親為講說
遠近化之有槎溪集傳于世焉

周必大草書達意宋史

周必大字子充宋孝宗時除秘書少監兼直學士上喜其精論
欲與之日夕論文德壽加尊號必大曰太上萬壽而紹興末議
文及近上表用嗣皇帝為未安按建炎遙拜徽宗表及唐憲宗
上順宗尊號兩文皆稱皇帝議遂定宋趙雄使金賞國書議受
書禮必大立具草略謂尊卑分定或較等威叔姪親情豈嫌坐
起上廢之曰未嘗諭國書之意而卿能道朕心中事此大才也

袁甫物與心契宋史

袁甫字廣微寶文閣直學士熒之子宋理宗嘉定七年准第
一簽書建康軍節度判官廳公事授秘書省正字入對遷秘書

郎甫少服父訓謂學者當師聖人以自得為貴又從楊簡問學
自謂吾觀草木之發生聽禽鳥之和鳴與我心契其樂無涯

包恢聰異宋史

包恢字宏父自其父楊世父約叔父遜從朱熹陸九淵學恢少
為諸父門人講大學其言高明諸父驚焉宋理宗嘉定十三年
舉進士調金谿主簿

晁補之致蘇軾閣筆宋史

晁補之字無咎父端友工於詩補之聰敏強記纔解事即善屬
文王安國一見奇之十七歲從父官杭州粹錢塘山川風物之
麗著述以謁州通判蘇軾軾先欲有所賦讀之嘆曰吾可以
足筆矣又稱其文博辯雋偉絕人遠甚必顯於世年五十八補
之才氣飄逸嗜學不知倦文章溫潤典綉其凌麗奇卓出於天

成尤精楚詞論集屈宋以來賦詠為變離騷等三書

王介續荆公題事文類聚

王介素與荆公不相能荆公題江寧道中驛舍一聯云茅屋滄洲一酒旗午烟孤起隔林炊介鄙之書其末曰金陵村裏王夫子可是能吟富貴詩公見之亦不屑意乃續之云江晴日暖蘆花轉恰似春風柳絮時

桑維翰著日出扶桑賦事文類聚

桑維翰舉進士主司惡其姓維翰慨然著日出扶桑賦以見志

楊奐試賦論第一元史

楊奐字煥然母嘗夢東南日光射其身旁一神人以筆授之已而奐生其父以為文明之象因名之曰奐年十一母歿哀毀如成人金末舉進士不中乃作萬言策指陳時病皆人所不敢言

者未及上而歸教授鄉里歲癸巳金元帥崔立以汴京降奐從北渡冠氏帥趙壽之即延致奐待以師友之禮門人有自京師載書來者因得聚而讀之東平嚴實聞奐名數問其行歲奐終不一詣元太宗時試諸道進士奐試東平兩中賦論第一

雷膺砥礪元史

雷膺字彥正生七歲而孤金末母侯氏挈膺北歸渾源艱險備嘗織紝以為業課膺讀書膺篤志於學事母以孝聞元太宗時詔郡國設科選試凡占儒籍者復其家膺年甫弱冠得與其選愈自砥礪遂以文學稱中統二年為翰林脩撰同知制誥兼國史院編脩

董文用講說元史

董文用字彥材俊之子也生十歲父死長兄文炳教諸弟有法

文用學問早成弱冠試詞賦中選時以真定真城奉英宗莊聖
太后湯沐庚戌太后命擇邑中子弟來上文用始從文炳謁太
后于和林城元世祖在潛藩命文用主文書講說帳中常見評
重癸丑世祖受命憲宗自河西征雲南大理文用與弟文忠從
軍督糧械贊軍務丁巳世祖令授皇子經是為北平王雲南王
也中統元年為中書左右司郎中

楊果登科 元史

楊果字正卿幼失怙恃自宋遷亳復徙居許昌以章句授徒為
業流寓軾軻十餘年性聰敏美風姿工文章尤長於樂府外若
詞論內懷智用善諧謔聞者絕倒微時避亂河南娶霽旅中女
即登科歷顯仕竟與偕老不易其初心人以是稱之世祖中統
元年為北京宣撫使後拜叅知政事

王約博覽 元史

王約字彥博性穎悟風格不凡從中丞魏初游博覽經史工文
辭務達國體時好不以動其心元世祖至元十三年翰林學士
王磐薦為從事承旨轉授從仕郎翰林國史院編脩

葉李應召 元史

葉李字太白至元十四年世祖命御史大夫相威行臺江南且
求遺逸以李姓名上初李攻宋賈似道書其末有前年之師適
有天幸克成厥勲之語世祖習聞之每拊掌稱歎及是其姓名
聞世祖太悅即授奉訓大夫浙西道儒學提舉李聞命欲遁去
而使者致丞相安童書有云先生在宋以忠言讜論著稱簡在
帝心今授以五品秩士君子當隱見隨時其尚悉心以報殊遇
李乃幡然北向再拜曰仕而得行其言此夙心也敢不奉詔

至元二十三年侍御史程文海奉命搜賢江南世祖諭之曰此行必致葉季來季既至京師勅集賢大學士阿魯渾撒里館于院中它日召見披香殿勞問卿遠來良苦且曰卿嚮時訟似道書朕嘗識之更詢以治道安出李歷陳古帝王得失成敗之由世祖首肯賜坐錫宴更命五日一入議事

姚燧有作者風 元史

姚燧字端甫生三歲而孤育於伯父樞樞隱居蘇門謂燧蒙暗教督之甚急燧不能堪楊奐馳書止之曰燧令器也長自有成尔何以急為且許醮以女年十三見許衡於蘇門十八始受學於長安時未嘗為文視流輩所作惟見其不如古人則心弗是也二十四始讀韓退之文試習為之人謂有作者風稍就正於衡衡亦賞其辭且戒之曰弓矢為物以待盜也使盜得之亦將

待之文章固發聞士子之利器然先有能一世之名將何以應人之見役者哉非其人而與之與非其人而拒之鈞罪也非周身斯世之道也世祖至元中授奉議大夫兼提舉陝西四川中興等路學校

王構該博 元史

王構字肯堂少穎悟風度疑厚學問該博文章典雅弱冠以詞賦中選為東平行臺掌書記叅政賈居貞一見器重俾其子受學焉世祖至元中授翰林國史院編脩官

熊與可隱居授學 元史

熊朋來字與可宋咸淳甲戌登進士第第四人授從仕郎寶慶府簽書判官廳公事未上而宋亡元世祖初得江南盡求宋之遺立而用之尤重進士以故相留夢炎為尚書召甲戌狀元王

龍澤為江南行臺監察御史朋來龍澤榜下進士而聲名不在龍澤下然不肯表襮苟進隱處州里間生徒受學者常百數十人取朱子小學書提其要領以示之學者家傳其書幾遍天下翰林學士元明善以朋來薦于朝未及召而卒

馮子振文如簇錦 元史

馮子振世祖時人其豪俊與陳孚略同孚極敬畏之自以為不可及子振於天下之書無所不記當其為文也酒酣耳熱命侍史二三人潤筆以俟子振據案疾書隨紙數多寡頃刻輒盡雖事料醲郁美如簇錦律之法度未免少有乖刺人亦以此少之

陳孚天材 元史

陳孚字剛中幼清峻穎悟讀書過目輒成誦終身不忘元世祖至元間孚以布衣上大一統賦江湘行省為轉聞於朝署上蔡

書院山長孚天材過人其詩文大抵任意即成不事雕斲有文集行于世焉

董朴學充養 元史

董朴字太初元世祖至元中召為太史院主事朴自幼強記比冠師事劉舜臣幡然有求道之志朴之為學自六經及孔孟微言與凡先儒所以開端闡幽者莫不研極其旨而會通之故其心所自得往往有融貫之妙其事親孝與人交智愚貴賤一待以誠或有犯之者夷然不與之校王結曰朴之學造詣既深充養交至其為人清而通和而介書字人也朴家近龍岡學者因稱之曰龍岡先生云

張特立蒙賜嘉名 元史

張特立字文舉通程氏易晚教授諸生東平嚴實每加禮焉歲

丙午元世祖在潛邸受王印首傳旨諭特立曰前監察御史張特立養素丘園易代如今年幾七十研究聖經宜錫嘉名以光潛德可特賜號曰中庸先生又諭曰先生年老日病不能就道故令趙寶臣諭意且名其讀書之堂曰麗澤壬子歲復降璽書諭特立曰白首窮經誨人不倦無過不及學者宗之昔已賜嘉名今復諭意

趙子昂英邁 元史

趙孟頫字子昂幼聰敏讀書過目輒成誦爲文操筆立就年十四用父蔭補官試中吏部銓法調真州司戶參軍宋亡家居益自力於學元世祖至元二十三年行臺侍御史程鉅夫奉詔搜訪遺逸于江南得孟頫以入見孟頫才氣英邁神采煥發如神仙中人世祖顧之喜使坐左必葉李上或言孟頫宋宗室子不

宜使近左右帝不聽至元二十七年遷集賢直學士

齊履謙推步星曆 元史

齊履謙字伯恒父義善筭術履謙生六歲從父至京師七歲讀書一過即能記憶年十一教以推步星曆盡曉其法十三從師聞聖賢之學自是以窮理爲務非沫泗伊洛之書不讀世祖至元十六年初立太史局政治新曆履謙補星曆生同輩皆司天台官子太史王恂問以筭數莫能對履謙獨隨問隨答恂大奇之至元二十九年授星曆教授

臧夢鮮魯山爲號 元史

臧夢鮮博學洽聞爲時名儒然不少迂腐而敏於政事其操守尤爲介特所著書有周官考三卷春秋微一卷夢鮮嘗自號魯山大夫士之稱之者不以官皆曰魯山先生云元成宗大德初

官至湘東肅政廉訪副使

袁楠獻議 元史

袁楠字伯長宋同知樞密院事韶之曾孫為童孺時已著聲部使者舉茂才異等起為麗澤書院山長元成宗大德初闈復程文海王構薦為翰林國史院檢閱官時初建南郊楠進十議甚詳明禮官推其博多採用之楠在詞林朝廷制冊勳臣碑銘多出其手英宗至治元年遷侍講學士

李木子翬無此 元史

李木魯翬字子翬嘗從京兆蕭軒游其學益宏翰林學士承旨姚燧以書抵翬曰燧見人多笑學問文章無足與子翬比倫者於是翬以女妻之成宗大德十一年授襄陽縣儒學教諭

揭傒碩史筆 元史

揭傒斯字碩實讀書尤刻苦晝夜不少懈父子自為師友由是貫通百氏早有文名元成宗大德間稍出游湘漢湖南師趙淇雅號知人見之驚曰他日翰苑名流也程鉅夫盧摯先後為湖南憲長咸器重之鉅夫因妻以從妹元仁宗延祐初鉅夫摯列薦于廟特授翰林國史院編脩官時平章李孟監脩國史讀其所撰功臣列傳嘆曰是方可名史筆若他人直謄史牘爾

歐陽玄下筆成章 元史

歐陽玄字原功始從鄉先生學日記數千言即知屬文部使者行縣玄以諸生見命賦梅花詩立成十首晚歸增至百首見者駭異之年十四益從宋故老習為詞章下筆輒成章每試座序輒占高等弱冠下帷數年人莫見其面經史百家靡不研究伊洛諸儒源委尤為淹貫仁宗延祐元年以尚書與貢賜進士授

岳州路平江州同知

黃潛博學子元史

黃潛字晉卿生而俊異博極天下之書而約之於至精剖析經史疑難及古今因革制度名物之屬旁引曲證多先儒所未發文辭布置謹嚴接據精切俯仰雍容不大聲色譬之澄湖不波一碧萬頃魚鼈蛟龍潛伏不動而淵然之光自不可犯云仁宗延祐二年進士第授台州寧海丞後官至祕書少監

陳櫟教授元史

陳櫟字壽翁元仁宗延祐初詔以科舉取士櫟不欲就試有司強之或鄉閭中選遂不復赴禮部教授於家不出門戶者數十年性孝友尤剛正日用之間動中禮法與人交不以勢合不以利交嘗言學有真誼不徒臨川吳澄嘗稱櫟有功於朱氏也

凡江東人來受業於澄者盡遣而歸櫟櫟所居堂曰定字學者因以定字先生稱之終不仕

張夢臣廷試第一元史

張起巖字夢臣元仁宗延祐中進士稍遷集賢修撰轉國子博士先是元世祖至元乙酉三月乙亥太史奏文昌星明文運將興時世祖行幸上京明日丙子皇孫降生於儒州是夜起巖亦生其後皇孫踐祚是為仁宗始詔設科取士及廷試起巖遂為第一論者以為非偶然也

楊仲宏文名動京師元史

楊載字仲宏少孤博涉羣書為文有跌宕氣年四十不仕戶部賈國英數薦于朝以布衣召為翰林國史院編修官與修武宗實錄調管領係官海船萬戶府照磨兼提控按牘延祐初仁宗

以科目取士載首應詔遂登進士第授承務郎饒州路同知浮
梁州事遷儒林郎寧國路總管府推官以卒初吳興趙孟頫在
翰林得載所為文極推重之由是載之文名隱然動京師凡所
撰述人多傳誦之其文章一以氣為主博而敏直而不肆自成
一家言而於詩文尤有法嘗語學者曰詩當取材於漢魏而音
節則以唐為宗自其詩出一洗宋季之陋

趙子昂比蘇李元史

趙孟頫字子昂為集賢直學士元仁宗眷之甚厚以字呼之而
不名仁宗嘗與侍臣論文學之士以孟頫比唐李白宋蘇子瞻
又嘗稱孟頫操履復純正博學多聞書畫絕倫旁通佛老之旨皆
人所不及有不悅者問之仁宗初若不聞又有上書言國史所
載不宜使孟頫與聞者仁宗乃曰趙子昂世祖皇帝所簡朕

特優以禮貌置於館閣典司述作傳之後世此屬嗷嗷何也俄
賜鈔五百錠

元明善求正元史

元明善字復初早以文章自豪出入秦漢間晚益精該有文集
行世初在江西金陵每與虞集劇論以相切劘明善言集治諸
經惟朱子所定者耳自漢以來先儒所嘗盡心者考之殊未博
集亦言凡為文辭得所欲言而止必如明善云若雷霆之震驚
鬼神之靈變然後可非性情之正也二人初相得甚驩至京師
乃復不能相下董士選自中臺出為江州行省也二人者俱送出
都門外士選曰伯生以教道為職當早還復初宜更送我集還
明善送至二十里外士選下馬入邸舍中為席出囊中肴酌酒
同飲乃舉酒屬明善曰士選以功臣子出入臺省無補國家惟

求得佳士數人爲朝廷用之如復初與伯生他日必皆光顯然恐不免爲人構間復初中原人也仕必當道伯生南人將爲復初摧折今爲我飲此酒慎勿如是明善受卮酒跪而釀之起立言曰誠如公言無論他日今際已開矣請公再賜二卮明善終身不敢忘公言乃再飲而別真人吳全節與明善交尤密嘗求明善作文既成明善謂全節曰伯生見吾文必有譏彈吾所欲知成季爲我治具招伯生來觀之若已入石則無及矣明日集至明善出其文問何如集曰公能從集言去百有餘字則可傳矣明善即泚筆屬集凡刪百二十字而文益精當明善大喜乃驩好如初集每見明經之士亦以明善之言告之仁宗延祐中官至翰林學士

吳世不文法元史

吳萊字立天天資絕人尤善論文嘗云作文如用兵法有正有奇正是法度要部任分明奇是不爲法度所縛舉眼之頃千變萬化坐作進退擊刺一時俱起及其欲止什伍各還其隊元不曾亂聞者服之柳貫平極慎許與每稱萊爲絕世之才黃潛晚年謂人曰萊之文蘄絕雄深類秦漢間人所作實非今世之士也吾縱操觚一世又安敢及之哉其爲前輩所推許如此仁宗時調長蘄書院山長

元明善穎悟元史

元明善字復初其先蓋拓跋魏之裔居清河者至明善四世矣明善天資穎悟絕出讀書過目輒記諸經皆有師法而尤深於春秋弱冠游吳中已名能文章爲中書左曹掾擢太子文學仁宗即位改翰林待制與修成宗順宗實錄陞翰林直學士詔即

文譯其闕政要者以進明善舉宋忠臣子集賢直學士
以譯潤許之書成每奏一篇帝必稱善曰二帝三王之道
大聞也與聖太后既受尊號廷臣請因肆赦明善曰數赦
之福宥過可也

宋本善為義理之學元史

誠夫自幼穎拔異羣兒既成童聚經史窮日夜讀之句
必通貫乃已嘗從父禎官江陵江陵王奎文明性命義
本往質所得造詣日深善為古文辭必已出峻潔刻厲
罕四十始還燕英宗至治初賜進士及第授翰林脩撰
程端禮動有師法元史

享敬叔幼穎悟純篤十五歲能記誦六經曉析大義家
其州俗自宋季以下皆尊尚陸九淵氏之學而朱熹氏

學不行於慶元端禮獨從史蒙卿游以得朱氏明體適用之精
學者及門甚眾所著有讀書工程國子監以頒示郡邑校官為
學者式仕為衢州路儒學教授卒年七十五弟端學字時叔通
春秋登英宗至治辛酉進士第授遷居縣丞尋改國子助教勳
有師法學者以其剛嚴方正咸嚴憚之遷太常博士兄弟並有
時名鄉里稱之

周仁榮變俗元史

周仁榮字本心父敬孫宋太學生初金華王栢以朱熹之學主
台之上蔡書院敬孫與同郡楊珏陳天瑞車若水黃超然朱致
中薛松年師事之受性理之旨敬孫嘗著易象占尚書補遺春
秋類例仁榮承其家學又師珏天瑞治易禮春秋而工為文章
用薦者署美化書院山長美化在處州萬山中人鮮知學仁榮

舉行鄉飲酒禮士俗為變後辟江湘行省掾史省臣皆呼先生
不以吏遇之元泰定帝時召拜國子博士遷翰林脩撰陞集賢
待制奉旨代祀嶽瀆至會稽以疾作不復還朝卒年六十有一
其所教弟子多為名人而泰不華實為進士第一

同恕領教魯齋 元史

同恕字寬甫家世業儒恕為人安靜端凝羈此如成人從鄉先
生學日記數千言十三以書經魁鄉校元世祖至元間朝廷始
分六部選名士為吏屬關陝以恕貢禮曹辭不行仁宗踐阼即
其家拜國子司業階儒林郎使三召不起陝西行臺侍御史趙
世延請即奉元置魯齋書院中書奏恕領教事制可之先後來
學者殆千數仁宗延祐初設科再主鄉試人服其公六年以奉
議大夫太子左贊善召入見東宮賜酒慰問繼而獻書歷陳古

讀書開悟涵養之道明年春英宗繼統以疾歸泰定帝致和元
年拜集賢待讀學士以老疾辭恕之學由程朱上溯孔子孟務實
決事理以利於行教人曲為開導使得趣向之正焉

李洞大名 元史

李洞字溉之生有異質始從學即穎悟彊記作為文辭如宿習
者姚燧以文章負大名一見其文深歎異之薦于朝授翰林國
史院編脩文宗天曆初遷翰林直學士

李洞自擬李白 元史

李洞文宗時為奎章閣學士骨骼清峻神情開朗秀眉踈髯目
瑩如電顏面如冰玉而唇如渥丹然我冠袞衣望之者疑為神
仙中人也其為文章奮筆揮洒迅飛疾動汨汨滔滔思態疊出
縱橫奇變若紛錯而有條理意之所至臻極神妙洞每以李太

白自儼當世亦以是許之嘗游匡廬王屋少室諸山留連久乃去人莫測其意也

虞集隨事規諫 元史

虞集字伯生元文宗時為翰林直學士奉詔修遼金宋三史再閱歲書乃成上進以目疾丐解職不允乃舉治書侍御史馬祖常自代不報御史中丞趙世安乘間為集請曰虞伯生久居京師甚貧又病自幸假一外任便醫帝怒曰一虞伯生汝輩不容耶帝方嚮用文學以集弘才博識無施不宜一時大典冊咸出其手故重聽其去集每承詔有所述作必以帝王之道治忽之故從容諷切冀有感悟承顧問及古今政治得失尤委曲盡言或遇事規諫出不語人諫或不入歸家悒悒不樂家人見其然不敢問其故也

虞集為文萬卷 元史

虞集字伯生學雖博洽而究極本原研精探微心解神契其經緯彌綸之妙一寓諸文藹然有前代風烈嘗以江左先賢甚眾其人皆未易知其學皆未易言後生晚進知者鮮矣欲取太原元好問中州集遺意別為南州集以表章之以病目而止平生為文萬篇藁存者十二三早歲與弟槃同闢書舍為二室左室書陶淵明詩於壁題曰陶庵右室書邵堯夫詩題曰邵庵故世稱邵庵先生文宗除奎章閣侍書學士

成遵見稱公輔 元史

成遵字誼叔幼敏悟讀書日記數千百言年十五喪父家貧勤苦不廢學問二十能文章時郡中先輩無治進士業者遵欲為以不合程式為患一日憤然曰四書五經吾師也文無逾於史

漢韓柳區區科舉之作何難哉會楊惠初登第來尹穰遵乃書所作數十篇見之惠撫卷大喜語之曰以此取科第如拾芥耳文宗至京師受春秋業於夏鎮遂入成均爲國子生時陳旅爲助教喜其文數以語于奎章閣侍書學士虞集集亟欲見之旅令以已馬俾導馳詣集集方有目疾見遵來迫而視之曰適觀生文今見生貌公輔器也後登進士第

陳繹文辭浩博

元史

陳繹曾字伯敷與徽州程文同時程之文章明潔而精深虞伯生亦多稱之繹曾爲人雖口吃而精敏異常諸經註疏多能成誦文辭汪洋浩博其氣燁如也二人學行與陳旅相伯仲云繹曾寧宗時爲國子助教

張翥詩文

元史

張翥字仲舉元順帝至正初召爲國子助教翥少負才雋豪放不羈喜音樂不以家業屑其意其父以爲憂翥一旦翻然改曰大人勿憂今請易業矣乃謝客閉門讀書晝夜不暫輟因受業於空存先生存江東大儒也其學傳於陸九淵氏翥從之游道德性命之說多所研究未幾留杭又從仇遠先生學遠於詩最高翥學之盡得其音律之與於是翥遂以詩文知名一時其近體長短句尤工文不如詩而每以文自負常語人曰吾於文已化矣蓋吾未嘗構思特任意屬筆而已它日翰林學士沙刺班示以所爲文請易置數字苦思者移時終不就沙刺班曰先生於文豈猶未化耶何思之苦也翥因相視大笑蓋翥平日善諧謔出談吐語輒令人失笑一座盡傾入其室諠然春風中也所爲詩文甚多翥嘗集兵興以來死節死事之人爲書曰忠義錄

識者避之

許有壬文湧層瀾 元史

許有壬字可用元順帝至正中為集賢大學士兼太子諭德歷事七朝垂五十年遇國家大事無不盡言皆一根至理而曲盡人情當權臣恣睢之時稍忤意輒誅竄隨之有壬絕不為巧避計事有不便明辨力諍不知有死生利害君子多之有壬善筆札工辭章歐陽玄序其文謂其雄渾閑雋湧如層瀾迫而求之則淵靚深實蓋深許之也

陳旅館閣之器 元史

陳旅字衆仲世素以儒學稱旅幼孤資稟穎異其外大父趙氏學有源委撫而教之旅得所依不以生業為務惟篤志於書無所不讀稍長及笈至溫陵從鄉先生傳古直詩聲名於

用薦者為閩海儒學官適御中丞馬雍古相常使泉南一見奇之謂旅曰子館閣器也胡臣留滯于此因相勉遊京師既至翰林侍講學士虞集見其文慨然歎曰此所謂我老將休付子斯文者矣即延至館中切以道義學問相講習自謂得旅之助為多與祖常交口游於諸公間咸以為旅博學多聞宜居師範之選中書平章政事趙世延又力薦之除國子助教居三年考滿諸生不忍其去請于朝再任馬寧宗元統中出為江淞儒學副提舉順帝至正中入為應奉翰林文字

李孝光名譽日聞 元史

李孝光字季和少博學篤志居古隱居鴈蕩山五峯下四方之士遠來授學名譽日聞泰不燕以師事之南行臺監察御史闔辭屢薦居館閣元順帝至正七年詔徵隱士以秘書監著作郎

召與完者圖執禮哈琅董立同應詔赴京師見帝于宣文閣進
孝經圖說帝大悅賜上尊明臣陞文林郎祕書監丞孝光以文
章負名當世其文一取法古人而不趨世尚非先秦兩漢語弗
以措辭有文集二十卷傳於世焉

伯顏隨問辨解元史

伯顏一名師聖字宗道哈剌魯民隸軍機蒙古萬戶府世居開
州濮陽縣伯顏生三歲常以指畫地或三或六若為卦者六歲
從里儒授孝經論語即成誦喪父其兄曲出買經傳等書以
資之日夜誦不輟稍長受業不進士建安黃坦坦曰此子穎悟
過人非諸生可比因命以顏為氏且名而字之焉久之坦辭曰
余不能為爾師羣經有朱子說具在歸而求之可也伯顏自弱
冠即以斯文為己任其於大經大法絜然有觀而心所自得毋

出於言意之表鄉之學者來相質難隨問隨辨咸解其惑於是
中原之士聞而從游者日盈眾元順帝至正中以隱士徵至
京師授翰林待制

歐陽玄文人間寶重元史

歐陽玄字原功仕元順帝為翰林學士承旨特授湖廣行省
右丞致仕賜玉帶給俸終身玄性度雍容含弘續密處已儉
約為政廉平歷官四十餘年在朝之日殆四之三三任成均
而兩為祭酒六入翰林而三拜承旨修實錄大典三史皆大
製作屢主文衡兩知貢舉及讀卷官凡宗廟朝廷雄文大冊
播告萬方制誥多出玄手金縢上尊之賜幾無虛歲海內名
山大川釋老之宮王公貴人墓隧之碑得玄文辭以為榮片
言隻字派傳人間咸知寶重文章道德卓然名世羽儀斯文

贊衛治具與有功焉

揭傒斯嚴整 元史

揭傒斯字彥碩為文章敘事嚴整語簡而當詩尤清婉麗密善楷書行草朝廷大典冊及元勳茂德當得銘辭者必以命為殊方絕域咸慕其名得其文者莫不以為榮云順帝時遷翰林待制陞集賢學士

劉桂翁教學有法 元史

劉詵字桂翁性穎悟幼失父知自樹立年十二作為科場律賦論策之文蔚然有成氣象宋之遺老鉅公一見即以斯文之任期之既冠重厚醇雅素以師道自居教學者有法聲譽日隆江南行御史臺屢以教官館職遺逸薦皆不報詵為文根柢六經躡躒諸子百家融液今古而不露其跡屬風發

之狀四方求入者日盈門者其所為詩文曰桂隱集

詵所號也

群書集事淵海卷之三十六

群書集事淵海卷之三十一

人物門

釋

佛祖

佛氏之始

釋迦佛中天竺化脇而生釋氏通鑑

周昭王二十六年釋迦牟尼佛賢劫第四佛也是年四月八日示生於中天竺迦毗羅衛國彼國乃三千世界之中故佛生於彼也父淨梵王母摩耶夫人母於是日遊歡喜園手攀無憂樹

群書集事淵海卷之三十六

群書集事淵海卷之三十一

人物門

釋

佛祖

佛氏之始

釋迦佛中天竺化脇而生釋氏通鑑

周昭王二十六年釋迦牟尼佛賢劫第四佛也是年四月八日示生於中天竺迦毗羅衛國彼國乃三千世界之中故佛生於彼也父淨梵王母摩耶夫人母於是日遊歡喜園手攀無憂樹

枝太子化從右脇而生自行七步分手指天地曰天上天下唯我獨尊空中九龍吐水灌太子身父王字之曰悉達多也

臨兒國生浮屠老子為教

魏書

臨兒國浮屠經云其國王生浮屠浮屠太子也父曰屑頭邪母云莫邪浮屠身服色黃髮青如青絲乳青毛蛉赤如銅始莫邪夢白象而孕及生從母左脇出生而有結墮地能行七步此國在天竺城中天竺又有神人名沙律昔漢哀帝元壽元年博士弟子景盧受大月氏王使伊存口受浮屠經曰復立者其人也浮屠所載臨蒲塞桑門伯聞䟽問白䟽間比丘晨門皆弟子號也浮屠所載與中國老子經相出入蓋以為老子西出關過西域之天竺教胡浮屠屬弟子別號合有二十九不能詳載故略之如此

佛教

興佛氏之教者

漢明求教入中國後漢

明帝夢見金人長大頂有日月光以問群臣或曰西方有神其名曰佛陛下所夢得無是乎於是遣使天竺問其道術而圖其形像焉佛者漢言覺也將以覺悟群生也其教以修善慈心為主不殺生專務清靜其精者為沙門沙門漢言息也蓋息意去欲而歸於無為又以為人死精神不滅隨復受形生時善惡皆有報應故貴行善修道以鍊精神以至無生而得為佛也佛長丈六尺黃金色頂中佩日月光變化無方無所不入而大濟群生

欽禪師建徑山道場釋氏通鑑

唐玄宗天寶三載徑山國一法欽禪師初開元十年依鶴林素禪師出家因有省自此日用妙密超放無拘辦道既久請遊南方素曰乘流而行遇徑即止師禮辭之至是南至餘杭東北徑山默省素語乃登岡阜尋駐錫之地西過危峯之北石岩之隈跌坐石床有老人前致敬曰願捨此居之地為師駐錫之所即請師南進登山絕頂入五峯之間有大湫指謂師曰吾家若去此湫當留一穴之水幸勿堙之我時來相助言訖乃隱於是雲霧晦冥風雨驟作連夜不息及逗曉雨霽秋水盡涸漲沙遂平惟一穴尚存謂之龍井北峯之陽復有草庵可居師遂安禪於此四方雲衲欽慕高道撥草瞻風營巢聚枝未逾數載庵居漏於岩谷名走叢林道滿天下今庵基見在諸草不生

傳法

佛氏以教法相傳者

世尊以微妙法門作偈相傳釋氏通鑑

周穆王五十二年大梵天王至靈山會上以金色娑羅花獻世尊世尊拈花示衆人天百萬悉皆固措獨金色頭陀破顏微笑世尊曰吾有正法眼藏涅槃妙心實相无相微妙法門分付摩訶迦葉聽吾偈曰法本法无法无法法亦法今付无法時法法何曾法

初祖迦葉尊者周懿王五年以正法付阿難偈曰法法本來法無法無非法何於一法中有法有不法乃奉世尊僧伽梨衣於鷄足山入滅盡定以俟彌勒下生

二祖阿難尊者周厲王十一年以正法付商那和修偈曰本

來付有法付了言無法各各須自悟了無無法乃入三昧
分身四分與天宮龍宮二國王供養住世凡百三十二年
叱利國三祖商那和修尊者周宣王二十二年以正法付優
波翹多尊者偈曰非法亦非心無心亦無法說是心法時是
法非心法既付法已即隱於罽賓國南象白山中後於三昧
中見翹多五百徒衆多憊慢乃往彼現龍奮迅三昧以調伏
之乃作十八變化火光三昧自焚其身

西天四祖曼波翹多尊者周平王三十年付法於提多迦偈
曰心自本來心本心非有法有法有本心非心非本法乃踊
身虛空呈十八變復于本座跏趺而逝

五祖提多迦尊者周莊王五年於中天竺國以法付彌遮迦
尊者偈曰通達本法心無法無法悟了同未悟無心得無

法遂示寂

西天六祖彌遮迦尊者周襄王十五年以法付娑須密多尊
者偈曰無心無可得說得不名法若了心非心始解心心法
遂示寂

西天七祖娑須密多尊者周定王十七年以法付佛陀難提
尊者偈曰心同虛空界示等虛空法證得虛空時無是無非
法遂示寂

西天八祖佛陀難提尊者周景王十年以法付伏駄密多尊
者偈曰虛空無內外心法亦如是若了虛空故是達真如理
遂示寂

西天九祖伏駄密多尊者周敬王三十三年以法付脇尊者
偈曰真理本無法因名顯真理受得真真法非真亦非偽遂

示寂

西天十祖脇尊者周定王二十二年以法付富那夜奢偈曰
真體自然真因真說有理領得真真法無行亦無止遂示寂
西天十一祖富那夜奢尊者周安王十四年以法付馬鳴大
士偈曰迷悟如隱顯明暗不相離今付隱顯法非一亦非二
遂示寂

西天十二祖馬鳴大士周顯王四十一年以法付迦毘摩羅
尊者偈曰隱顯即本法明暗元無二今付悟了法非取亦非
棄遂示寂

中印土十三祖迦毘摩羅尊者周赧王四十一年以法付龍
樹大士偈曰非顯非隱法說是真實際悟此隱顯法非愚亦
非智遂現神變化火焚身

南印土十四祖龍樹大士秦始皇三十五年以法付迦那提
婆尊者偈曰為明隱顯法方說解脫理於法既無證無真亦
無喜遂示寂

西天十五祖迦那提婆尊者漢文帝後元三年以法付羅睺
羅多偈曰本對傳法人為說解脫理於法實無證無終復無
始遂放八光而歸寂滅

室羅筏城十六祖羅睺羅多尊者漢武帝元鼎四年以法付
僧迦難提偈曰於法實無證不取亦不離法非有無相內外
云何起遂安坐示寂

摩竭提國十七祖僧伽難提尊者漢昭帝元平元年以法付
伽耶舍多尊者偈曰心地本無生因地從緣起緣種不相妨
花果亦復爾即右手攀樹而化

西天十八祖伽耶舍多尊者漢成帝永始四年以法付鳩摩多偈曰有種有心地因緣得發萌於緣不相礙當生生不生踊身虛空作十八變化火光三昧自焚

西天十九祖鳩摩多尊者王莽地皇三年以法付奢夜多偈曰性上本無二為對來人說於法既無得何懷決不決即以指甲釐面如紅蓮開放光入滅

西天二十祖奢夜多尊者東漢明帝永平十七年以法付婆修盤頭偈曰一片合無生同於法界性若能如是解通達事理竟即以首植木枝奄然而化

西天二十一祖婆修盤頭尊者東漢安帝元初四年以法付摩拏羅偈曰一切同無礙如何不了悟達法在其中非今亦非古即跏趺而逝

西天二十二祖摩拏羅尊者東漢桓帝延熹九年以法付勒那偈曰心隨萬境轉轉處實能幽隨流認得性無喜亦無憂即示寂

西天二十三祖鶴勒那尊者東漢獻帝建安十三年以法付師子比丘偈曰認得心性時可說不思議了了無可得得時不說知復告以後難乃示寂衆欲分舍利復現空中說偈一法一切法一切一法攝吾身非有無何分一切落

西天二十四祖師子尊者蜀漢後主延熙十一年以法付婆舍斯多偈曰正說知見時知見俱是心當息即知見知見即于今付法已祖留蜀窟

天竺二十五祖婆舍斯多尊者東晉明帝太寧三年以法付不如密多偈曰聖人說知見當境無非是我今悟真性無道

亦無理遂示寂

天竺二十六祖不如密多東晉孝武帝太元十三年以法付般若多羅偈曰真性心地處無頭亦無尾應緣而化物方便呼為智遠示寂

二十七祖般若多羅南宋孝武帝大明元年以法付菩提達磨偈曰心地含諸種因心復生理果滿菩提圓花開世界起即於座立舒左右手放光二十七道踊身虛空化火自焚空中舍利如雨

西天二十八祖達磨大師默坐九年學者益眾至是忽謂其徒曰吾西返之時至矣汝等盡言所得道副曰如我所見不執文字不離文字而為道用師曰汝得吾皮尼總持曰我見如慶喜見阿闍佛國一見更不再見師曰汝得吾肉道有白

四大本空五陰非有而我見處無一法可得師曰汝得吾骨慧可禮三拜依位而立師曰汝得吾髓即顧慧可曰世尊正法眼藏展轉授吾吾今付汝吾滅後二百餘年衣止不傳法周沙界潛符密契千萬有餘汝當闡化勿輕未悟一念回機便同本有聽吾偈曰吾本來茲土傳法救迷情一花開五葉結果自然成乃往禹門千聖寺十月初五日端坐而逝壽一百五十歲門人奉全身葬熊耳山定於寺時梁武帝大通元年也

二祖慧可大師陳文帝天嘉元年以法付僧璨偈曰本來緣有地因地種花生本來無有種花亦不曾生復云汝且處深山勿懼世難然吾亦有夙累今要頂之祖遂留鄴都隨宜行化

隋煬帝大業二年三祖僧璨大師初周武廢教師往來司空山十餘年人無識之者開皇十二年壬子遇沙彌道信禮師曰乞和尚與解脫法門師曰誰縛汝曰無人縛曰何更求解脫乎信大悟久之與授具戒後知其緣熟乃付以法衣而說偈曰花種元因地從地種花生若無人下種花地亦無生師即優游江國歷羅浮諸山復還舊止十月十五日當說法次即於衆會中儼立合掌而逝唐代宗謚鏡智禪師師嘗著信心銘言約義豐妙畫宗極世傳誦之

四祖道信大師唐太宗貞觀十八年以法付弟子弘忍大師偈曰華種有生性因地華生生大緣興信合當生生不生遂以學徒委之

五祖弘忍大師唐高宗咸亨三年開化於新州黃梅破頭山

時六祖乃嶺南盧居士名惠能年三十二來叅祖曰求作佛祖曰嶺南人無佛性曰人有南北佛性豈然祖異之曰若槽廠去能入碓方服勞經八箇月師告衆各述一偈語意冥符則衣法皆付神秀上座書偈云身是菩提樹心如明鏡臺時時勤拂拭莫遣惹塵埃師見曰依此修行亦得道果能聞之亦命人於秀偈側書曰菩提本無樹明鏡亦非臺本來無一物何處有塵埃師見之故曰此誰作亦未見性即於是夕潛呼能至告曰諸佛出世為一大事因緣隨機小大而引化之遂有三乘等法然以微妙秘密正法眼藏付于迦葉展轉傳授以至於吾吾今授汝聽吾偈曰有情來下種因地果還生無情既無種無性亦無生能跪受畢又曰衣止汝身勿復傳也且當遠引俟時行化逢懷且止遇會即藏能禮辭通夕

南邁師由是三日不上堂衆疑問之師曰吾道行矣又曰衣法誰傳師曰能者傳之衆知盧居士也尋已不在相率追之趕至大庾嶺頭能置衣鉢於石慧明上座先至舉之莫能動即曰我來求法不求其衣六祖乃曰不思善不思惡正當恁麼時還我明上座本來面目明大悟曰密語外還更有意旨否六祖曰我今與汝說者即非密也汝若返照密却在汝邊六祖令向北橋人六祖後至曹溪又被惡人尋逐乃晦迹於四會懷集之間四年隱於獵人中常為獵人說法獵人悟者甚衆

道安嘆法流東國在道老釋氏通鑑

東晉孝武帝太元九年慧遠法師少為儒生博極群書嘗與弟慧持造安法師席下聞出世間法而悅之歎曰儒道九流特批瀛耳遂出家安門徒數十人居第一座之尊歎曰使道流東國

其在遠乎至是以秦亂來遊于晉

羅什廣說諸經流化晉書

鳩摩羅什年二十龜茲王迎之還國廣說諸經四遠學徒莫之能抗有頃羅什母辭龜茲王往天竺留羅什住謂之曰方等深教不可思議傳之東土惟爾之力但於汝無利其可如何什曰必使大化流傳雖苦而無恨母至天竺道成道身三果西域諸國咸伏羅什神雋每至講說諸王皆長跪坐側令羅什踐而登焉

泗洲僧自西土遊中國釋氏通鑑

唐高宗龍朔三年泗洲大士僧伽初自碎葉國遊于西涼復顯化洛陽

釋波利取尊勝咒釋氏通鑑

唐高宗弘道元年初北印土罽賓國沙門佛陀波利此云護儀鳳元年至五臺清凉山逢一叟問曰爾來何為曰欲禮文殊曰曾持佛頂尊勝咒來否曰未也曰此土衆生犯四棄者多能回取咒以流此土作大利益弟子當示師文殊所在叟忽不見波利乃返本國取咒至於長安有旨命杜行顛及日照三藏番譯譯訖賜利鍰絹三十四匹至是利又將梵本訪西明寺僧順貞奏共譯出名尊勝陀羅尼乃第三出也與杜令譯者大同小異比諸衆譯此最弘布波利即入五臺後不知終

神通

神妙不測者

釋太子一箭貫諸鼓

釋氏通鑑

周昭王三十五年佛年十歲與兄弟擗力以手擲象於城外還

以手接園中有金鼓銀鼓石鼓鐵鼓各七重太子一箭徹過諸鼓

佛乘天馬陵虛而去

釋氏通鑑

周昭王四十四年佛年十九歲出城四門遊觀於東南西見老病死生厭離心於城北門見出家人生欣樂心二月八夜乘天馬踰城陵虛而去至檀特山自以寶劍絕其鬚髮淨居天人舉僧伽梨因乃服之入彌樓山阿藍迦處習不用處定者三年方入正覺

耆域能分身五百舍釋氏通鑑

晉惠帝太安元年沙門耆域知洛將亂辭歸天竺有僧乞一言為誠域令會衆人衆集域昇座曰守口攝身意慎莫犯衆惡修行一切善如是得度世言訖便默於是數百人各請域中食域

皆許往明日五百舍皆有一域始謂獨過及相讐問方知分身降焉既行有遠送者域徐行追者弗及域畫地曰於此別矣其日有從長安來者見域在彼寺又賈客其夕會域于流沙計已九千餘里

異僧能撥天見天宮 釋氏通鑑

東晉孝武帝太元十年正月二十七日道安法師見有異僧出入窻隙安以生處問之僧曰當生兜率即以手虛撥天西北即雲開備見兜率天宮之妙又曰當浴聖僧方果所願具示浴法後安設浴見有數十小兒入寺須臾但聞浴室用水聲久之不見開室而巾濕水減果是聖應也二月八日忽告衆曰吾當去無疾跣跌而逝

杯度乘木杯渡水 釋氏通鑑

東晉安帝隆安五年杯度比丘常乘木杯渡水神化莫測時在彭城羅什聞之嘆曰吾與此子戲別三百年矣相見杳然未期逢於來世耳

元暢能掌中流水 釋氏通鑑

南宋孝武帝大明四年西域功德直至荊州釋元暢請出念佛三昧等經暢刊正文義辭旨婉切暢能舒手出香掌中流水莫之測也

寶誌能令鱸成活魚 釋氏通鑑

南宋明帝太始二年寶誌大士往來皖山劍水之下髮而徒跣著錦袍面方而瑩徹如鏡手足皆烏瓜初金陵東陽民朱氏之婦聞兒啼鷹巢中梯樹得之舉以為子七歲依鍾山僧倫出家專修禪觀至是顯迹以前剪尺拂子掛杖頭負之而行經聚落兒

童諱逐之或微索酒或累日不食嘗遇食餉者從而求之食者分啗之而有輕薄心誌即吐水中皆成活魚時時題詩初若不可解後皆有驗

邵碩分身一履之驗釋氏通鑑

南宋蒼梧王元徽元年沙門邵碩康居國人與誌公最善出入經行不問夜旦意欲求之則去游益州以滑稽言事能發人嗤笑因勸以善家家喜之至人家眠地者家必有死能分身於數處刺史劉孟明挹事之忽著布帽詣明少時明卒先是孟明長史沈仲玉改鞭杖之格嚴重常科碩謂玉曰天地敷敷從此起若除鞭格得刺史玉除之及明卒仲玉果行州事是年九月將亡謂沙門法進曰願露骸松下然脚頭著屐進諾之已而化昇其尸露之明日往視失所在俄有自郫縣來者曰昨見碩公著

一履行市中曰為我語進公小兒見欺止為我隻履進問沙彌答曰昇尸時一履隨行不及屐也

弘明伏虎釋山精釋氏通鑑

南齊武帝永明四年會稽釋弘明年壽八十四明誦法華習禪禮懺為業每旦水瓶自滿天童為其給使虎嘗入室伏其床前久之乃去又山精來惱明以腰繩繫之鬼謝乃放

寶誌化身非一釋氏通鑑

南齊武帝永明七年帝怒大士寶誌惑眾收建康獄是日人見大士游行市井而檢校仍在獄中其夕語吏曰門外有兩輿食金鉢盛飯汝可取之果文惠太子竟陵王送供至建康令呂文顯以聞帝悔謝迎至禁中俄帝宴後宮誌乃暫出已而猶見行道于顯陽殿帝驚遣吏至問吏曰誌久出在首中帝益神敬

之後誌假神力於武帝見高帝於地下受錐刀之苦帝自是永廢錐刀誌之神異化人非一

法匱化身三處釋氏通鑑

南齊武帝永明七年釋法匱出家於枳園寺誦經守素一日還其舊居又至定林復還枳園後三處考之皆見匱來中食實是一時而三處焉是晚奄然而卒尸亡香軟衆咸悟其得果遂聞於帝帝親臨幸為設僧供文惠文二皆來頂禮為管理殮葬觀施雲集仍以其錢起枳園寺塔

慧安焰從身出釋氏通鑑

南齊明帝建武二年沙門慧安年八為沙彌止江陵寺當衆僧坐時輒起行水常執空瓶自上及下水用不竭衆訝之及受具重異蓋者一沙門慧濟上堂菩薩堂戶未開安自壁入

濟駭之後附商入湘中路示寂將死謂商曰我死即露尸岸上不須設棺商如其旨以尸投岸夜有焰從其身出商大怖及舟至湘中則安已先至欲就語又失所在

惠初無舟度江釋氏通鑑

齊東昏侯永元二年釋僧惠初南陽劉虬立陟屺寺請以居之惠常欲度江津吏以舟小未及過之惠已在彼岸又至病人家惠嗔者必死喜者必差又能分身赴人之供是年示寂神異甚多

誌公飛錫止鶴釋氏通鑑

梁武帝天監四年舒州潛山最奇絕而山麓尤勝誌公與白鶴道人皆欲之因稟武帝帝以二人俱具靈通俾各以物識其地得者居之道人云某以鶴止處為記誌公云某以卓錫處為記